



Broj: 01-50-1-15-20/15  
Sarajevo, 24.11.2015.

**ZAPISNIK**  
**20. sjednice Predstavničkog doma**  
**Parlamentarne skupštine Bosne i Hercegovine,**  
**održane 24.11.2015.**

Sjednica je počela u 10 sati. Prisustvovalo je 38 poslanika.

Prvi zamjenik predsjedavajuće Doma Mladen Bosić pozvao je sve prisutne da minutom šutnje odaju počast pripadnicima Oružanih snaga Bosne i Hercegovine ubijenim u terorističkom aktu izvršenom 18.11.2015. u Sarajevu Nedeljku Radiću i Arminu Salkiću, kao i svim žrtvama brutalnog terorističkog napada u Parizu, 13. novembra 2015. godine, i ostalim žrtvama terorističkih napada izvedenih u posljednje vrijeme u svijetu.

Odsustvo su opravdale predsjedavajuća Doma Borjana Krišto, poslanica Milica Marković i poslanik Željko Komšić, a poslanik Sadik Ahmetović najavio je kašnjenje.

Sjednici su prisustvovali članovi Vijeća ministara BiH, članovi Ureda za reviziju institucija BiH i predstavnici Agencije za prevenciju korupcije i koordinaciju borbe protiv korupcije.

Sjednicom je predsjedavao prvi zamjenik predsjedavajuće Predstavničkog doma Mladen Bosić.

Iz međunarodnih organizacija sjednicu su pratili predstavnici OHR-a i EUSR-a, predstavnici britanske ambasade, a iz nevladinih organizacija prisustvovali su predstavnici OSCE-a i USAID-a.

Prvi zamjenik predsjedavajuće Doma Mladen Bosić rekao je da će poslanicima, u skladu s članom 171. Poslovnika, na početku sjednice, a prije rasprave o dnevnom redu, biti omogućeno postavljanje poslaničkih pitanja u usmenoj formi.

U skladu s članom 172. Poslovnika, najave za postavljanje poslaničkih pitanja u usmenoj formi dostavili su sljedeći poslanici:

- **Damir Bećirović** – ministru vanjskih poslova BiH;
- **Amir Fazlić** – ministru vanjskih poslova BiH (poslanici Bećirović i Fazlić postavili su usmena pitanja na prošloj sjednici Doma, ali usmeni odgovor nisu dobili zbog odsustva ministra vanjskih poslova BiH. Naknadno je dostavljen odgovor u pisanoj formi na navedena pitanja, ali će poslanicima biti omogućeno da pitanja u usmenoj formi postave i danas, ako žele);
- **Miroslav Milovanović** – predsjedavajućem Vijeća ministara BiH;
- **Jasmin Emrić** – predsjedavajućem Vijeća ministara BiH;
- **Salko Sokolović** – ministru vanjske trgovine i ekonomskih odnosa BiH;

- **Šemsudin Mehmedović** – ministru sigurnosti BiH;
- **Hanka Vajzović** – ministru sigurnosti BiH;
- **Predrag Kožul** – predsjedavajućem Vijeća ministara BiH i ministru civilnih poslova BiH;
- **Saša Magazinović** – ministru sigurnosti BiH;
- **Damir Arnaut** – ministru pravde BiH.

Prvi zamjenik predsjedavajuće rekao je da su poslanica Maja Gasal-Vražalica i poslanik Nikola Špirić najave poslaničkih pitanja u usmenoj formi dostavili po isteku roka od 24 sata utvrđenog članom 172. stav (1) Poslovnika, tako da će poslanici ova pitanja moći postaviti na narednoj sjednici Doma, predviđenoj za postavljanje poslaničkih pitanja u usmenoj formi.

Ove najave su, u skladu s članom 172. Poslovnika, dostavljene predsjedavajućem Vijeća ministara BiH i onom članu Vijeća ministara BiH na koga se pitanje odnosi. Predsjedavajuća je podsjetila da je osiguran direktan TV prijenos ovog dijela sjednice, u skladu s članom 171. stav (1) Poslovnika.

Nakon ovih napomena, pristupilo se usmenom postavljanju poslaničkih pitanja i davanju odgovora redosljedom dostavljanja najava.

**Damir Bećirović i Amir Fazlić** uputili su pitanja ministru vanjskih poslova BiH, ali zbog odsustva ministra sjednici Doma izjasnili su se da će pitanje postaviti na sjednici kada ministar bude prisutan.

**Miroslav Milovanović** uputio je pitanje predsjedavajućem Vijeća ministara BiH, ali je zbog odsustva predsjedavajućeg sjednici Doma odgodio postavljanje pitanja do sjednice kada predsjedavajući Vijeća ministara bude prisutan.

#### **Jasmin Emrić**

Pitanje upućeno predsjedavajućem Vijeća ministara BiH: „Koje aktivnosti su vođene u ovoj godini, šta je urađeno, te da li su od strane nadležnih organa Bosne i Hercegovine izvršene sve pripremne radnje i postupci radi otvaranja stalnog graničnog prelaza za pogranični saobraćaj Tržačka Raštela – Kordunski Ljeskovac?<sup>1</sup>

- **Predsjedavajući Vijeća ministara BiH nije prisustvovao sjednici Doma, a s obzirom na to da niko iz Vijeća ministara BiH nije pripremio odgovor, ovo pitanje bit će postavljeno na narednoj sjednici predviđenoj za postavljanje usmenih poslaničkih pitanja.**

#### **Salko Sokolović**

Pitanje upućeno ministru vanjske trgovine i ekonomskih odnosa BiH:

„Pitanje 1. – Da li ste proveli sve aktivnosti na usaglašavanju Zakona o veterinarstvu, Zakona o hrani i Zakona o poljoprivredi i ruralnom razvoju sa zakonodavstvom EU, s posebnim naglaskom na definiranje nadležnosti i komandnog lanca?

<sup>1</sup> Dio neautoriziranog transkripta 20. sjednice Predstavničkog doma.

Pitanje 2. Kada će spomenuta zakonska rješenja doći u Parlament na plenarnu raspravu, odnosno da li ste ostvarili potreban nivo saradnje i koordinacije s nadležnim entitetskim ministarstvima za rješavanje uočenih nedostataka iz izvještaja inspekcije?<sup>2</sup>

- **Ministar vanjske trgovine i ekonomskih odnosa BiH nije prisustvovao sjednici Doma, a s obzirom na to da niko iz Vijeća ministara BiH nije pripremio odgovor, ovo pitanje bit će postavljeno na narednoj sjednici predviđenoj za postavljanje usmenih poslaničkih pitanja.**

**Šemsudin Mehmedović**

*Pitanje upućeno ministru sigurnosti BiH:* „Obzirom da se radi o pomoćniku ministra sigurnosti, ovlaštenom licu sa pristupom tajnim podacima, koji očigledno izbjegava pravdu moje pitanje ministru je sljedeće – Da li po zakonu ima osnova da istog suspenduje, oduzme mu dozvolu za pristup tajnim podacima, te istog udalji privremeno sa posla kao što se radi i sa ostalim državnim službenicima i kada se pokrene disciplinski postupak a ne kada je optužnica pravomoćna? Drugo, da li je poziv suda zaprimljen u Ministarstvu i šta kani poduzeti po tom pitanju? Treće, kako to može tako visoko pozicionairani državni službenik izbjegavati pravdu, rušiti ugled Bosne i Hercegovine a da nadležni ministar šuti? Četvrto, da li ministar ima uvida u rad takve osobe, naročito kada je u pitanju suradnja sa međunarodnim sigurnosnim službama, obzirom na to da je ista osoba u timu za borbu protiv terorizma, a što može uzrokovati nenadoknadivu štetu, kako Bosni i Hercegovini, tako i ugledu sigurnosnih službi u međunarodnim odnosima?<sup>3</sup>

- **Odgovor na pitanje dao je zamjenik ministra sigurnosti BiH Mijo Krešić. Poslanik Šemsudin Mehmedović zatražio je da se na navedeno pitanje dostavi i odgovor u pisanoj formi.**

**Hanka Vajzović**

*Pitanje upućeno ministru sigurnosti BiH:* „Tražim da mi se dostave podaci o ukupnom broju zaposlenih Bošnjaka, Hrvata, Srba i tzv. ostalih, razvrstano u tabelarnom prikazu prema pozicijama državnih službenika, odnosno, prema činovima policijskih službenika, i to zasebno u Ministarstvu i po pojedinim agencijama/službama iz sastava ministarstva. Eto to je, hvala. Naravno, ukoliko okvirno može se iz Ministarstva odgovoriti a ovi detaljni podaci razumijem da ne mogu biti baš za ovoliko vremena napravljeni pa će biti u pisanoj formi“<sup>4</sup>

- **Zamjenik ministra sigurnosti BiH Mijo Krešić odgovorio je da će najdalje do naredne sjednice dostaviti tačne i precizne podatke.**

**Predrag Kožul**

*Pitanje upućeno predsjedavajućem Vijeća ministara BiH i ministru civilnih poslova BiH:* „Na području Tuzlanskog kantona ne postoji mogućnost da djeca hrvatske nacionalnosti izučavaju maternji, hrvatski jezik. Zbog toga djeca – osnovci, čiji roditelji insistiraju na tome, putuju (neka i više od 40 km) do KŠC-a u Tuzli ili se upisuju u škole u Brčko Distriktu gdje takvu mogućnost imaju.

<sup>2</sup> Dio neautoriziranog transkripta 20. sjednice Predstavničkog doma.

<sup>3</sup> Dio neautoriziranog transkripta 20. sjednice Predstavničkog doma.

<sup>4</sup> Dio neautoriziranog transkripta 20. sjednice Predstavničkog doma.

S obzirom na to da je riječ o pravu djece, kakvo rješenje Ministarstvo nudi za ovo pitanje koje se sve češće pojavljuje u izučavanju sva tri službena jezika konstitutivnih naroda u Bosni i Hercegovini, te šta nadležne institucije preduzimaju?“

**Odgovor na pitanje dao je zamjenik ministra civilnih poslova BiH Đorđe Miličević. Poslanik Predrag Kožul zatražio je da se na navedeno pitanje dostavi i odgovor u pisanoj formi.**

**Saša Magazinović**

Pitanje upućeno ministru sigurnosti BiH: „Dokle smo došli sa implementacijom Dodatnog protokola Konvencije o kibernetičkom kriminalu koji smo kao država, je li, davno potpisali i dužni u skladu s tim bili unaprijediti naše zakonodavstvo? Kakav je kapacitet i broj slučajeva koji su procesuirani a tiču se ovih djela? Kakva je suradnja sigurnosnih agencija, i uopšte u ovoj oblasti šta se poduzima, imajući u vidu da je najveća propaganda u zadnje vrijeme, i kad je u pitanju terorizam a i komunikacija, upravo se dešava putem interneta?“<sup>5</sup>

**- Odgovor na pitanje dao je zamjenik ministra sigurnosti BiH Mijo Krešić. Poslanik Saša Magazinović izrazio je nezadovoljstvo datim odgovorom.**

**Damir Arnaut**

Pitanje upućeno ministru pravde BiH: „Uzimajući u obzir jasne odredbe člana V.3. Ustava BiH, koji, *inter alia*, propisuje isključivu nadležnost Predsjedništva BiH po pitanju vođenja vanjske politike, predstavljanja BiH u međunarodnim organizacijama i institucijama, te ratifikacije međunarodnih ugovora, molim da mi odgovorite zbog čega je Ministarstvo pravde BiH zatražilo stav Predsjedništva BiH o eventualnom pokretanju procedure za prihvatanje i ratifikaciju Amandmana na Rimski statut Međunarodnog krivičnog suda tek 11.9.2015., pet godina nakon što su ti amandmani usvojeni na Revizijskoj konferenciji u Kampali, te na osnovu čega (odluka, zaključak ili drugi akt Predsjedništva BiH) je Ministarstvo pravde BiH tokom petogodišnjeg perioda „ocijenilo da treba uzeti u obzir i daljnji razvoj događaja u smislu postupanja drugih država članica...“, odnosno na osnovu čega (odluka, zaključak ili drugi akt Predsjedništva BiH) je u istom petogodišnjem periodu u svojim odgovorima Ministarstvu vanjskih poslova BiH o temi Ministarstvo pravde BiH naglašavalo da je pitanje amandmana na Rimski statut još uvijek otvoreno pitanje?“

**- Odgovor na pitanje dao je ministar pravde BiH Josip Grubeša. Poslanik Damir Arnaut zatražio je da se na navedeno pitanje dostavi i odgovor u pisanoj formi.**

\*\*\*\*\*

U vezi sa izmjenama dnevnog reda sjednice, zamjenik predsjedavajuće napomenuo je sljedeće:

S ranijeg dnevnog reda skinute su:

---

<sup>5</sup> Dio neautoriziranog transkripta 20. sjednice Predstavničkog doma.



- **Tačka 4.** – Prijedlog zakona o izmjenama i dopunama Zakona o udruženjima i fondacijama Bosne i Hercegovine, predlažać: Vijeće ministara BiH, zakon broj: 01,02-02-1-20/15, od 13.11.2015. (prvo čitanje) - predlažać je 23.11.2015. dostavio akt o povlačenju navedenog prijedloga zakona iz procedure.
- **Tačka 5.** – Prijedlog zakona o neradnim danima u vrijeme vjerskih praznika u Bosni i Hercegovini, predlažać: Vijeće ministara BiH, zakon broj: 01,02-02-1-21/15, od 28.10.2015. (prvo čitanje) - na zahtjev Ustavnopravne komisije.

Nakon ovih napomena otvorena je rasprava o dnevnom redu sjednice.

Staša Košarac predložio je dopunu dnevnog reda tačkom: „Informacija Vijeća ministara BiH u vezi s terorističkim napadom na pripadnike Oružanih snaga Bosne i Hercegovine dana 18.11.2015.“ uz prijedlog da se sjednica Doma prekine dok Vijeće ministara ne dostavi traženu informaciju.

Klub poslanika SDPBiH predložio je dopunu tačkom: „Razmatranje stanja sigurnosti u Bosni i Hercegovini“.

Damir Arnaut je, u ime poslanika Kluba SBB-a, predložio da se dnevni red sjednice dopuni tačkom: „Informacija o stanju sigurnosti u Bosni i Hercegovini i terorističkom napadu u Rajlovcu“.

Aleksandra Pandurević predložila je dopunu dnevnog reda tačkom: „Razmatranje informacije o kršenju ljudskih prava i sloboda, te prava iz oblasti rada od strane rukovodstva kompanije 'Boksit', Milići“.

Poslanik Šemsudin Mehmedović predložio je da se s dnevnog reda skine tačka: „Davanje saglasnosti za ratifikaciju Ugovora o državnoj granici između Bosne i Hercegovine i Crne Gore“.

U raspravi o predloženom dnevnom redu i prijedlozima za dopune dnevnog reda učestvovali su: Saša Magazinović, Nikola Špirić, Denis Bećirović, Staša Košarac, Zaim Backović, Momčilo Novaković, Šefik Džaferović, Mirsad Đonlagić, Damir Arnaut, Dušanka Majkić, Diana Zelenika, Aleksandra Pandurević, Lazar Prodanović, Nikola Lovrinović, Mirsad Mešić, Šemsudin Mehmedović i Sadik Ahmetović.

Nakon toga, pristupilo se izjašnjavanju o prijedlozima za dopunu dnevnog reda.

Prijedlog poslanika Staše Košarca za dopunu dnevnog reda tačkom: „Informacija Vijeća ministara BiH u vezi s terorističkim napadom na pripadnike Oružanih snaga Bosne i Hercegovine dana 18.11.2015“, kao i prijedlog da se sjednica prekine dok Vijeće ministara ne dostavi traženu informaciju nisu usvojeni – „za“ je glasalo devet poslanika (iz Federacije BiH četiri i iz Republike Srpske pet poslanika), „protiv“ devet, a „suzdržanih“ je bilo 19 poslanika.

Klub poslanika SDPBiH povukao je svoj prijedlog za dopunu dnevnog reda, jer je sadržan u prijedlogu Kluba poslanika SBB-a.

Prijedlog Kluba poslanika SBB-a za dopunu dnevnog reda tačkom: „Informacija o stanju sigurnosti u Bosni i Hercegovini i terorističkom napadu u Rajlovcu“ modificiran je na prijedlog

Nikole Lovrinovića i glasi: „Informacija o stanju sigurnosti u Bosni i Hercegovini s posebnim osvrtom na teroristički napad u Rajlovcu, kao i događaj od 20.11.2015. u vezi s generalom Antom Jelečom“. Ovaj prijedlog dopune dnevnog reda usvojen je s 30 glasova „za“ (iz Federacije BiH 24, iz Republike Srpske šest), jedan „protiv“ i pet „suzdržanih“ glasova.

Prijedlog Aleksandre Pandurević za dopunu dnevnog reda tačkom: „Razmatranje informacije o kršenju ljudskih prava i sloboda, te prava iz oblasti rada od strane rukovodstva kompanije 'Boksit', Milići“ usvojen je s 24 glasa „za“ (iz Federacije BiH 18, iz Republike Srpske šest), pet „protiv“ i sedam „suzdržanih“ glasova.

U vezi s prijedlogom Šemsudina Mehmedovića za skidanje tačke dnevnog reda, prvi zamjenik predsjedavajuće rekao je da je to obavezna tačka dnevnog reda i da skidanje te tačke nije po Poslovniku Predstavničkog doma.

Prvi zamjenik predsjedavajuće konstatirao je da 20. sjednica Predstavničkog doma ima sljedeći

#### DNEVNI RED

1. Usvajanje Zapisnika 19. sjednice Predstavničkog doma Parlamentarne skupštine BiH;
2. Komentari na dobivene odgovore na poslanička pitanja;
3. **Informacija o stanju sigurnosti u Bosni i Hercegovini, s posebnim osvrtom na teroristički napad u Rajlovcu, kao i događaj od 20.11.2015. u vezi s generalom Antom Jelečom, predlagač: poslanik Damir Arnaut, broj: 01-50-1-15-20/15, od 24.11.2015.;**
4. Prijedlog zakona o azilu, predlagač: Vijeće ministara BiH, zakon broj: 01,02-02-1-12/15, od 6.8.2015. (drugo čitanje);<sup>6</sup>
5. **Razmatranje informacija o kršenju ljudskih prava i sloboda, te prava iz oblasti rada od strane rukovodstva kompanije „Boksit“, Milići, predlagač: poslanica Aleksandra Pandurević, broj: 01-50-1-15-20/15, od 24.11.2015.;**<sup>7</sup>
6. Izvještaj Ureda za reviziju institucija BiH o finansijskoj reviziji Agencije za antidopinšku kontrolu BiH za 2014. godinu, broj: 01-16-1-915/15, od 10.7.2015.;
7. Izvještaj Ureda za reviziju institucija BiH o finansijskoj reviziji Agencije za državnu službu BiH za 2014. godinu, broj: 01-16-1-916/15, od 10.7.2015.;
8. Izvještaj Ureda za reviziju institucija BiH o finansijskoj reviziji Agencije za forenzička ispitivanja i vještačenja BiH za 2014. godinu, broj: 01-16-1-917/15, od 10.7.2015.;

<sup>6</sup> **Ranija tačka 4.** - Prijedlog zakona o izmjenama i dopunama Zakona o udruženjima i fondacijama Bosne i Hercegovine, predlagač: Vijeće ministara BiH, zakon broj: 01,02-02-1-20/15, od 13.11.2015. (prvo čitanje), skinuta je s dnevnog reda zato što je predlagač 23.11.2015. dostavio akt o povlačenju navedenog prijedloga zakona iz procedure.

<sup>7</sup> **Ranija tačka 5.** - Prijedlog zakona o neradnim danima u vrijeme vjerskih praznika u Bosni i Hercegovini, predlagač: Vijeće ministara BiH, zakon broj: 01,02-02-1-21/15, od 28.10.2015. (prvo čitanje), skinuta je s dnevnog reda na zahtjev Ustavopravne komisije.

9. Izvještaj Ureda za reviziju institucija BiH o finansijskoj reviziji Agencije za javne nabavke BiH za 2014. godinu, broj: 01-16-1-918/15, od 10.7.2015.;
10. Izvještaj Ureda za reviziju institucija BiH o finansijskoj reviziji Agencije za lijekove i medicinska sredstva BiH za 2014. godinu, broj: 01-16-1-919/15, od 10.7.2015.;
11. Izvještaj Ureda za reviziju institucija BiH o finansijskoj reviziji Agencije za nadzor nad tržištem BiH za 2014. godinu, broj: 01-16-1-920/15, od 10.7.2015.;
12. Izvještaj Ureda za reviziju institucija BiH o finansijskoj reviziji Agencije za osiguranje u BiH za 2014. godinu, broj: 01-16-1-921/15, od 10.7.2015.;
13. Izvještaj Ureda za reviziju institucija BiH o finansijskoj reviziji Agencije za policijsku podršku BiH za 2014. godinu, broj: 01-16-1-922/15, od 10.7.2015.;
14. Izvještaj Ureda za reviziju institucija BiH o finansijskoj reviziji Agencije za poštanski saobraćaj BiH za 2014. godinu, broj: 01-16-1-923/15, od 10.7.2015.;
15. Izvještaj Ureda za reviziju institucija BiH o finansijskoj reviziji Agencije za predškolsko, osnovno i srednje obrazovanje BiH za 2014. godinu, broj: 01-16-1-924/15, od 10.7.2015.;
16. Izvještaj Ureda za reviziju institucija BiH o finansijskoj reviziji Agencije za prevenciju korupcije i koordinaciju borbe protiv korupcije BiH za 2014. godinu, broj: 01-16-1-925/15, od 10.7.2015.;
17. Izvještaj Ureda za reviziju institucija BiH o finansijskoj reviziji Agencije za rad i zapošljavanje BiH za 2014. godinu, broj: 01-16-1-926/15, od 10.7.2015.;
18. Izvještaj Ureda za reviziju institucija BiH o finansijskoj reviziji Agencije za razvoj visokog obrazovanja i osiguranje kvaliteta BiH za 2014. godinu, broj: 01-16-1-927/15, od 10.7.2015.;
19. Izvještaj Ureda za reviziju institucija BiH o finansijskoj reviziji Agencije za sigurnost hrane u BiH za 2014. godinu, broj: 01-16-1-928/15, od 10.7.2015.;
20. Izvještaj Ureda za reviziju institucija BiH o finansijskoj reviziji Agencije za statistiku BiH za 2014. godinu, broj: 01-16-1-929/15, od 10.7.2015.;
21. Izvještaj Ureda za reviziju institucija BiH o finansijskoj reviziji Agencije za školovanje i stručno usavršavanje kadrova BiH za 2014. godinu, broj: 01-16-1-930/15, od 10.7.2015.;
22. Izvještaj Ureda za reviziju institucija BiH o finansijskoj reviziji Agencije za unapređenje stranih investicija BiH za 2014. godinu, broj: 01-16-1-931/15, od 10.7.2015.;
23. Izvještaj Ureda za reviziju institucija BiH o finansijskoj reviziji Agencije za zaštitu ličnih podataka u BiH za 2014. godinu, broj: 01-16-1-932/15, od 10.7.2015.;
24. Izvještaj Ureda za reviziju institucija BiH o finansijskoj reviziji Arhiva BiH za 2014. godinu, broj: 01-16-1-933/15, od 10.7.2015.;
25. Izvještaj Ureda za reviziju institucija BiH o finansijskoj reviziji Centra za informiranje i priznavanje dokumenata iz oblasti visokog obrazovanja za 2014. godinu, broj: 01-16-1-934/15, od 10.7.2015.;
26. Izvještaj Ureda za reviziju institucija BiH o finansijskoj reviziji Centra za uklanjanje mina u BiH za 2014. godinu, broj: 01-16-1-935/15, od 10.7.2015.;
27. Izvještaj Ureda za reviziju institucija BiH o finansijskoj reviziji Direkcije za civilno zrakopološtvo BiH za 2014. godinu, broj: 01-16-1-936/15, od 10.7.2015.;

28. Izvještaj Ureda za reviziju institucija BiH o finansijskoj reviziji Direkcije za ekonomsko planiranje za 2014. godinu, broj: 01-16-1-937/15, od 10.7.2015.;
29. Izvještaj Ureda za reviziju institucija BiH o finansijskoj reviziji Direkcije za evropske integracije za 2014. godinu, broj: 01-16-1-938/15, od 10.7.2015.;
30. Izvještaj Ureda za reviziju institucija BiH o finansijskoj reviziji Direkcije za koordinaciju policijskih tijela BiH za 2014. godinu, broj: 01-16-1-939/15, od 10.7.2015.;
31. Izvještaj Ureda za reviziju institucija BiH o finansijskoj reviziji Državne agencije za istrage i zaštitu BiH za 2014. godinu, broj: 01-16-1-940/15, od 10.7.2015.;
32. Izvještaj Ureda za reviziju institucija BiH o finansijskoj reviziji Državne regulatorne agencije za radijacijsku i nuklearnu sigurnost BiH za 2014. godinu, broj: 01-16-1-941/15, od 10.7.2015.;
33. Izvještaj Ureda za reviziju institucija BiH o finansijskoj reviziji Fonda za povratak BiH za 2014. godinu, broj: 01-16-1-942/15, od 10.7.2015.;
34. Izvještaj Ureda za reviziju institucija BiH o finansijskoj reviziji Generalnog sekretarijata Vijeća ministara BiH za 2014. godinu, broj: 01-16-1-943/15, od 10.7.2015.;
35. Izvještaj Ureda za reviziju institucija BiH o finansijskoj reviziji Granične policije BiH za 2014. godinu, broj: 01-16-1-944/15, od 10.7.2015.;
36. Izvještaj Ureda za reviziju institucija BiH o finansijskoj reviziji Institucije ombudsmena za zaštitu potrošača u BiH za 2014. godinu, broj: 01-16-1-945/15, od 10.7.2015.;
37. Izvještaj Ureda za reviziju institucija BiH o finansijskoj reviziji Institucije ombudsmena za ljudska prava BiH za 2014. godinu, broj: 01-16-1-946/15, od 10.7.2015.;
38. Izvještaj Ureda za reviziju institucija BiH o finansijskoj reviziji Instituta za akreditiranje BiH za 2014. godinu, broj: 01-16-1-947/15, od 10.7.2015.;
39. Izvještaj Ureda za reviziju institucija BiH o finansijskoj reviziji Instituta za intelektualno vlasništvo BiH za 2014. godinu, broj: 01-16-1-948/15, od 10.7.2015.;
40. Izvještaj Ureda za reviziju institucija BiH o finansijskoj reviziji Instituta za mjeriteljstvo BiH za 2014. godinu, broj: 01-16-1-949/15, od 10.7.2015.;
41. Izvještaj Ureda za reviziju institucija BiH o finansijskoj reviziji Instituta za nestale osobe BiH za 2014. godinu, broj: 01-16-1-950/15, od 10.7.2015.;
42. Izvještaj Ureda za reviziju institucija BiH o finansijskoj reviziji Instituta za standardizaciju BiH za 2014. godinu, broj: 01-16-1-951/15, od 10.7.2015.;
43. Izvještaj Ureda za reviziju institucija BiH o finansijskoj reviziji Jedinice za realizaciju projekta za izgradnju Zavoda za izvršenje krivičnih sankcija, pritvora i drugih mjera BiH za 2014. godinu, broj: 01-16-1-952/15, od 10.7.2015.;
44. Izvještaj Ureda za reviziju institucija BiH o finansijskoj reviziji Komisije za koncesije BiH za 2014. godinu, broj: 01-16-1-953/15, od 10.7.2015.;
45. Izvještaj Ureda za reviziju institucija BiH o finansijskoj reviziji Konkurencijskog vijeća BiH za 2014. godinu, broj: 01-16-1-954/15, od 10.7.2015.;



46. Izvještaj Ureda za reviziju institucija BiH o finansijskoj reviziji Memorijalnog centra Srebrenica-Potočari, Spomen-obilježje i mezarje za žrtve genocida iz 1995. za 2014. godinu, broj: 01-16-1-955/15, od 10.7.2015.;
47. Izvještaj Ureda za reviziju institucija BiH o finansijskoj reviziji Ministarstva vanjske trgovine i ekonomskih odnosa BiH za 2014. godinu, broj: 01-16-1-956/15, od 10.7.2015.;
48. Izvještaj Ureda za reviziju institucija BiH o finansijskoj reviziji Ministarstva civilnih poslova BiH za 2014. godinu, broj: 01-16-1-957/15, od 10.7.2015.;
49. Izvještaj Ureda za reviziju institucija BiH o finansijskoj reviziji Ministarstva finansija i trezora BiH za 2014. godinu, broj: 01-16-1-958/15, od 10.7.2015.;
50. Izvještaj Ureda za reviziju institucija BiH o finansijskoj reviziji Ministarstva komunikacija i prometa BiH za 2014. godinu, broj: 01-16-1-959/15, od 10.7.2015.;
51. Izvještaj Ureda za reviziju institucija BiH o finansijskoj reviziji Ministarstva odbrane BiH za 2014. godinu, broj: 01-16-1-960/15, od 10.7.2015.;
52. Izvještaj Ureda za reviziju institucija BiH o finansijskoj reviziji Ministarstva pravde BiH za 2014. godinu, broj: 01-16-1-961/15, od 10.7.2015.;
53. Izvještaj Ureda za reviziju institucija BiH o finansijskoj reviziji Ministarstva sigurnosti BiH za 2014. godinu, broj: 01-16-1-962/15, od 10.7.2015.;
54. Izvještaj Ureda za reviziju institucija BiH o finansijskoj reviziji Ministarstva vanjskih poslova BiH za 2014. godinu, broj: 01-16-1-963/15, od 10.7.2015.;
55. Izvještaj Ureda za reviziju institucija BiH o finansijskoj reviziji Ministarstva za ljudska prava i izbjeglice BiH za 2014. godinu, broj: 01-16-1-964/15, od 10.7.2015.;
56. Izvještaj Ureda za reviziju institucija BiH o finansijskoj reviziji Odbora državne službe za žalbe za 2014. godinu, broj: 01-16-1-965/15, od 10.7.2015.;
57. Izvještaj Ureda za reviziju institucija BiH o finansijskoj reviziji Parlamentarne skupštine BiH za 2014. godinu, broj: 01-16-1-966/15, od 10.7.2015.;
58. Izvještaj Ureda za reviziju institucija BiH o finansijskoj reviziji Komisije za očuvanje nacionalnih spomenika BiH za 2014. godinu, broj: 01-16-1-967/15, od 10.7.2015.;
59. Izvještaj Ureda za reviziju institucija BiH o finansijskoj reviziji Pravobranilaštva BiH za 2014. godinu, broj: 01-16-1-968/15, od 10.7.2015.;
60. Izvještaj Ureda za reviziju institucija BiH o finansijskoj reviziji Predsjedništva BiH za 2014. godinu, broj: 01-16-1-969/15, od 10.7.2015.;
61. Izvještaj Ureda za reviziju institucija BiH o finansijskoj reviziji Regulatorne agencije za komunikacije BiH za 2014. godinu, broj: 01-16-1-970/15, od 10.7.2015.;
62. Izvještaj Ureda za reviziju institucija BiH o finansijskoj reviziji Službe za zajedničke poslove institucija BiH za 2014. godinu, broj: 01-16-1-971/15, od 10.7.2015.;
63. Izvještaj Ureda za reviziju institucija BiH o finansijskoj reviziji Centralne harmonizacijske jedinice Ministarstva finansija i trezora BiH za 2014. godinu, broj: 01-16-1-972/15, od 10.7.2015.;
64. Izvještaj Ureda za reviziju institucija BiH o finansijskoj reviziji Centralne izborne komisije BiH za 2014. godinu, broj: 01-16-1-973/15, od 10.7.2015.;
65. Izvještaj Ureda za reviziju institucija BiH o finansijskoj reviziji Suda BiH za 2014. godinu, broj: 01-16-1-974/15, od 10.7.2015.;

66. Izvještaj Ureda za reviziju institucija BiH o finansijskoj reviziji Tužilaštva BiH za 2014. godinu, broj: 01-16-1-975/15, od 10.7.2015.;
67. Izvještaj Ureda za reviziju institucija BiH o finansijskoj reviziji Uprave BiH za zaštitu zdravlja bilja za 2014. godinu, broj: 01-16-1-976/15, od 10.7.2015.;
68. Izvještaj Ureda za reviziju institucija BiH o finansijskoj reviziji Ureda koordinatora za reformu javne uprave BiH za 2014. godinu, broj: 01-16-1-977/15, od 10.7.2015.;
69. Izvještaj Ureda za reviziju institucija BiH o finansijskoj reviziji Ureda za harmonizaciju i koordinaciju sistema plaćanja u poljoprivredi, ishrani i ruralnom razvoju BiH za 2014. godinu, broj: 01-16-1-978/15, od 10.7.2015.;
70. Izvještaj Ureda za reviziju institucija BiH o finansijskoj reviziji Ureda za razmatranje žalbi BiH za 2014. godinu, broj: 01-16-1-979/15, od 10.7.2015.;
71. Izvještaj Ureda za reviziju institucija BiH o finansijskoj reviziji Ureda za veterinarstvo BiH za 2014. godinu, broj: 01-16-1-980/15, od 10.7.2015.;
72. Izvještaj Ureda za reviziju institucija BiH o finansijskoj reviziji Ureda za zakonodavstvo Vijeća ministara BiH za 2014. godinu, broj: 01-16-1-981/15, od 10.7.2015.;
73. Izvještaj Ureda za reviziju institucija BiH o finansijskoj reviziji Ustavnog suda BiH za 2014. godinu, broj: 01-16-1-982/15, od 10.7.2015.;
74. Izvještaj Ureda za reviziju institucija BiH o finansijskoj reviziji Vijeća za državnu pomoć BiH za 2014. godinu, broj: 01-16-1-983/15, od 10.7.2015.;
75. Izvještaj Ureda za reviziju institucija BiH o finansijskoj reviziji Visokog sudskog i tužilačkog vijeća BiH za 2014. godinu, broj: 01-16-1-984/15, od 10.7.2015.;
76. Izvještaj Ureda za reviziju institucija BiH o finansijskoj reviziji Agencije za identifikacione dokumente, evidenciju i razmjenu podataka BiH za 2014. godinu, broj: 01-16-1-998/15, od 14.7.2015.;
77. Izvještaj Ureda za reviziju institucija BiH o finansijskoj reviziji Službe za poslove sa strancima BiH za 2014. godinu, broj: 01-16-1-999/15, od 14.7.2015.;
78. Izvještaj Ureda za reviziju institucija BiH o finansijskoj reviziji Uprave za indirektno oporezivanje BiH za 2014. godinu, broj: 01-16-1-1000/15, od 14.7.2015.;
79. Izvještaj o izvršenoj reviziji učinka o temi: „Uspostava javnih internih finansijskih kontrola (PIFC-a) u institucijama BiH“, materijal Ureda za reviziju institucija BiH, broj: 01/4-16-1-1091/15, od 3.8.2015.;
80. Izvještaj o primjeni Jedinstvenih pravila za izradu pravnih propisa u institucijama Bosne i Hercegovine, materijal Ministarstva pravde BiH, broj: 01,02-50-19-1331/15, od 19.10.2015.;
81. Izvještaj o učešću pripadnika Oružanih snaga BiH i policijskih službenika u operacijama podrške miru u periodu od 1. januara do 30. juna 2015., materijal Predsjedništva BiH, broj: 01,02-03-1348/15, od 21.10.2015.;
82. Informacija o Godišnjem planu obuke i vježbi pripadnika i jedinica Oružanih snaga Bosne i Hercegovine u inozemstvu za 2016. godinu, materijal Ministarstva odbrane BiH, broj: 03/1-03-1412/15, od 2.11.2015.;
83. Informacija o problemu rješavanja trajnog smještaja Agencije za prevenciju korupcije i koordinaciju borbe protiv korupcije u Istočnom Sarajevu, materijal

- Komisije za izbor i praćenje rada Agencije za prevenciju korupcije i koordinaciju borbe protiv korupcije, broj: 05/8-50-19-370-6/15, od 6.10.2015.;
84. Izbor četiri člana Upravnog odbora Agencije za razvoj visokog obrazovanja i osiguranje kvaliteta, materijal Privremene zajedničke komisije oba doma Parlamentarne skupštine BiH za provođenje procedure za izbor četiri člana Upravnog odbora Agencije za razvoj visokog obrazovanja i osiguranje kvaliteta, broj: 01,02-50-14-843-5/15, od 29.10.2015.;
85. Imenovanje jednog predstavnika akademske zajednice i jednog predstavnika nevladinog sektora u Komisiju za izbor i praćenje rada Agencije za prevenciju korupcije i koordinaciju borbe protiv korupcije, materijal Privremene zajedničke komisije oba doma Parlamentarne skupštine BiH za provođenje procedure za imenovanje jednog predstavnika akademske zajednice i jednog predstavnika nevladinog sektora u Komisiju za izbor i praćenje rada Agencije za prevenciju korupcije i koordinaciju borbe protiv korupcije, broj: 01,02-50-14-468-6,3/15, od 5.11.2015.;
86. Prijedlog zaključka o osnivanju Privremene zajedničke komisije oba doma Parlamentarne skupštine BiH za provođenje procedure za imenovanje zamjenika generalnog revizora Ureda za reviziju institucija BiH, predlagач: Zajednički kolegij oba doma Parlamentarne skupštine BiH, broj: 01,02-50-12-18-10,1/15, od 29.10.2015.;
87. Davanje saglasnosti za ratifikaciju Aneksa IV. Sporazuma između Bosne i Hercegovine i Kraljevine Norveške o finansiranju projekta u korist pravosuđa i/ili sudova i tužilaštava u Bosni i Hercegovini, broj: 01,02-05-2-1305/15, od 13.10.2015.;
88. Davanje saglasnosti za ratifikaciju Sporazuma između Vijeća ministara Bosne i Hercegovine i Vlade Republike Srbije o izgradnji međudržavnog mosta preko rijeke Drine s pratećim putnim objektima na lokaciji Bratunac – Ljubovija, broj: 01,02-05-2-1384/15, od 28.10.2015.;
89. Davanje saglasnosti za ratifikaciju Ugovora o državnoj granici između Bosne i Hercegovine i Crne Gore, broj: 01,02-05-2-1385/15, od 28.10.2015.;
90. Davanje saglasnosti za ratifikaciju Amandmana na Sporazum o grantu u okviru Državnog programa IPA 2009 za Bosnu i Hercegovinu – Pобољшanje infrastrukture regionalne osnovne saobraćajne mreže u BiH – željeznički saobraćaj – zaključen između Evropske investicione banke i Bosne i Hercegovine, broj: 01,02-05-2-1433/15, od 6.11.2015.

\* \* \* \* \*

#### **Ad.1. Usvajanje Zapisnika 19. sjednice Predstavničkog doma Parlamentarne skupštine BiH**

Prvi zamjenik predsjedavajuće rekao je da je poslanicima dostavljen Zapisnik.

Nije bilo primjedbi na Zapisnik.

Zapisnik 19. sjednice usvojen je s 36 glasova "za" (iz Federacije BiH 24, iz Republike Srpske 12), bez glasova „protiv“ i jednim „suzdržanim“ glasom.

#### **Ad.2. Komentari na dobivene odgovore na poslanička pitanja**

U skladu s članom 174. Poslovnika, tokom ove sjednice Doma pitanja u pisanoj formi postavili su poslanici:

- **Safer Demirović** – jedno pitanje postavio ministru civilnih poslova BiH, drugo pitanje postavio ministrici odbrane BiH;
- **Aleksandra Pandurević** – pitanje postavila direktoru Granične policije BiH;

Sadržaj postavljenih pitanja je sljedeći:

##### **Safer Demirović**

###### Pitanje upućeno ministru civilnih poslova BiH:

„Koji je procenat obavezne imunizacije djece predškolskog i školskog uzrasta u Bosni i Hercegovini?“

###### Pitanje upućeno ministrici odbrane BiH:

„Kakva je nacionalna zastupljenost oficirskog i vojničkog kadra u Oružanim snagama Bosne i Hercegovine?“

##### **Aleksandra Pandurević**

###### Pitanje upućeno direktoru Granične policije BiH:

„Da li je Mile Radišić u periodu od 10. do 18. 11. 2015. prešao granicu i ušao u BiH na nekom od graničnih prijelaza? Da li ste o tome proveli istragu kako bi eventualno bili utvrđeni propusti u obavljanju posla službenika Granične policije na prijelazima?“

Prvi zamjenik predsjedavajuće podsjetio je da su, u skladu s članom 174. Poslovnika, do ove sjednice Doma pitanja u pisanoj formi postavili poslanici:

- **Sadik Ahmetović** – pitanje postavio Upravi za indirektno oporezivanje BiH;
- **Senad Šepić** – jedno pitanje postavio Vladi Federacije BiH (Federalnom ministarstvu obrazovanja i nauke i Federalnom ministarstvu kulture i sporta), drugo – također Vladi Federacije BiH (Federalnom ministarstvu raseljenih lica i izbjeglica, Federalnom ministarstvu razvoja, preduzetništva i zanatstva, Federalnom ministarstvu poljoprivrede, vodoprivrede i šumarstva i Federalnom ministarstvu saobraćaja i komunikacija), te dva pitanja postavio Vijeću ministara BiH;
- **Hazim Rančić i Nikola Lovrinović** – inicijativu uputili Vijeću ministara BiH, Ministarstvu vanjskih poslova BiH i Predsjedništvu BiH;
- **Damir Arnaut** – zatražio da se uputi urgencija Ministarstvu pravde BiH za dostavljanje odgovora na dopunsko pitanje postavljeno u pisanoj formi, te postavio pitanje ministru vanjskih poslova BiH;
- **Mirsad Donlagić** – pitanje postavio ministru pravde BiH;
- **Jasmin Emrić** – inicijativu uputio Kolegiju Predstavničkog doma.

Sadržaj postavljenih pitanja je sljedeći:



**Sadik Ahmetović**

Pitanje postavljeno Upravi za indirektno oporezivanje: „Molim da mi se dostavi informacija i spisak radnika u ovoj direkciji koji su zaposleni bez konkursa u posljednjih dvanaest mjeseci. Molim da mi se spisak razvrsta po regionalnim ispostavama.“

**Senad Šepić**

Pitanje postavljeno Vladi Federacije BiH (Federalnom ministarstvu obrazovanja i nauke i Federalnom ministarstvu kulture i sporta): „Molim da mi dostavite informaciju o utrošku budžetskih sredstava – grantovi u sklopu vaših ministarstava s tačnim iznosima i primaocima/korisnicima navedenih grantova na prostoru cijele FBiH u periodu 2011. - 2015. godine. Molim da ih pripremite i dostavite po godinama.“

Vladi Federacije BiH (Federalnom ministarstvu raseljenih lica i izbjeglica, Federalnom ministarstvu razvoja, preduzetništva i zanatstva, Federalnom ministarstvu poljoprivrede, vodoprivrede i šumarstva i Federalnom ministarstvu saobraćaja i komunikacija): „Molim da mi dostavite informaciju koliko je sredstava, kome konkretno i na osnovu kojih kriterija dodijeljeno iz vaših budžeta na osnovu grant podrške ili drugih poticaja (bespovratna sredstva) u periodu 2011. - 2015. Molim da mi dostavite precizan spisak korisnika sa iznosima i po godinama (2011. – 2015.).“

Pitanja postavljena Vijeću ministara BiH:

1. Molim da mi dostavite informaciju o stanju slobode vjere, ubjeđenja i slobode govora u BiH. Molim da je dostavite najkasnije u roku od 30 dana.“
2. Molim da mi dostavite informaciju koliki je iznos, za koje su konkretno namjene Vijeće ministara i institucije na nivou BiH osigurali i dodijelili sredstva za podršku zdravstvenim ustanovama na prostoru BiH (budžetska sredstva, kreditna čiju je proceduru vodilo Vijeće ministara i institucije BiH, grant sredstva čiju su proceduru vodile institucije BiH)? Molim pregled ovih akcija u zadnjih osam godina (2007. – 2015. godina).“

**Hazim Rančić i Nikola Lovrinović**

Poslanička inicijativa upućena Vijeću ministara BiH, Ministarstvu vanjskih poslova BiH i Predsjedništvu BiH: „Zadužuju se Vijeće ministara BiH, Ministarstvo vanjskih poslova BiH i Predsjedništvo BiH da preduzmu sve potrebne mjere i aktivnosti kako bi se Bošnjacima u Republici Albaniji osiguralo sticanje statusa nacionalne manjine.“

**Damir Arnaut**

Pitanje postavljeno ministru vanjskih poslova BiH: „Koje radnje i aktivnosti je Ministarstvo vanjskih poslova BiH (MVPBiH) preduzelo u tekućoj godini s ciljem realizacije Odluke o uspostavljanju diplomatskih odnosa BiH s državama članicama UN-a s kojima diplomatski odnosi nisu uspostavljeni, te kada MVPBiH planira okončati sve aktivnosti s ciljem pune realizacije te odluke?“

**Mirsad Donlagić**

Pitanje postavljeno ministru pravde BiH:

„Da li Ministarstvo pravde BiH ima namjeru da iskoristi određene pravne mogućnosti i mehanizme kako bi se u slučaju odbjeglog a presuđenog za ratni zločin generala Vojske RS Novaka Đukića od Republike Srbije zatražilo okončanje sudskog procesa i izdržavanje zatvorske kazne?“

**Jasmin Emrić**

*Poslanička inicijativa upućena Kolegiju Predstavničkog doma:* „Na osnovu čl. 8., 170. i 174. Poslovnika Predstavničkog doma Parlamentarne skupštine BiH, podnosim poslaničku inicijativu kojom Predstavnički dom Parlamentarne skupštine Bosne i Hercegovine zadužuje Vijeće ministara Bosne i Hercegovine da, u skladu s članom 6. stav 3. Ugovora između Republike Hrvatske i Bosne i Hercegovine o graničnim prijelazima (u daljnjem tekstu: Ugovor), pokrene postupak izmjene i dopune Ugovora radi prekategoriizacije stalnog graničnog prijelaza za pogranični saobraćaj Kordunski Ljeskovac – Tržačka Raštela u granični prijelaz za međunarodni drumski saobraćaj putnika.“

Predsjedavajuća je rekla da su do današnje sjednice dostavljeni sljedeći odgovori na poslanička pitanja:

- na inicijativu **Senada Šepića**, usvojenu na 16. sjednici Doma, odgovor je dostavilo Vijeće ministara BiH, a na pitanja postavljena u pisanoj formi odgovore su dostavili: Federalno ministarstvo saobraćaja i komunikacija, Federalno ministarstvo kulture i sporta i Federalno ministarstvo obrazovanja i nauke);
- povodom dva pitanja **Denisa Bećirovića**, postavljena u pisanoj formi, obavještenja je dostavilo Vijeće ministara BiH;
- na pitanje **Monike Tomić**, postavljeno u pisanoj formi, odgovor je dostavilo Federalno ministarstvo poljoprivrede, vodoprivrede i šumarstva;
- na pitanje **Amira Fazlića**, postavljeno u usmenoj formi na 18. sjednici Doma, odgovor je dostavilo Ministarstvo vanjskih poslova BiH;
- na pitanje **Damira Bećirovića**, postavljeno u usmenoj formi na 18. sjednici Doma, odgovor je dostavilo Ministarstvo vanjskih poslova BiH;
- na dopunsko pitanje **Damira Arnauta**, postavljeno u pisanoj formi, odgovor je dostavilo Ministarstvo pravde BiH;
- na pitanje **Aleksandre Pandurević**, postavljeno u pisanoj formi, odgovor je dostavilo Vijeće ministara BiH.

Dostavljene odgovore komentirali su poslanici: Damir Arnaut, Maja Gasal-Vražalica, Aleksandra Pandurević, Monika Tomić, Nikola Lovrinović i Denis Bećirović.

**Damir Arnaut** izrazio je nezadovoljstvo jer nije dobio konkretan odgovor na svoje pitanje.

**Maja Gasal-Vražalica** izrazila je nezadovoljstvo zbog toga što još uvijek nije dobila odgovor od ministra civilnih poslova na pitanje postavljeno na Zajedničkoj sjednici oba doma PSBiH i zatražila da se uputi urgencija za dostavu odgovora.

**Monika Tomić** izrazila je nezadovoljstvo jer je odgovor koji je dobila od Ministarstva poljoprivrede, vodoprivrede i šumarstva nepotpun.

**Nikola Lovrinović** nezadovoljan je jer još uvijek nije dobio odgovor od Tužilaštva BiH na pitanje postavljeno prije tri mjeseca.

**Denis Bećirović** izrazio je sumnju u odgovor koji je dobio od Vijeća ministara u kojem kažu da se pitanje ne odnosi na njih.

**Ad.3. Informacija o stanju sigurnosti u Bosni i Hercegovini, s posebnim osvrtom na teroristički napad u Rajlovcu, kao i događaj od 20.11.2015., u vezi s generalom Antom Jelečom, predlažać: poslanik Damir Arnaut, broj: 01-50-1-15-20/15, od 24.11.2015.**

Prvi zamjenik predsjedavajuće dao je uvodne napomene, te otvorio raspravu.

U raspravi su učestvovali: Damir Arnaut, Šefik Džaferović, Hanka Vajzović, Staša Košarac, Diana Zelenika, Nikola Lovrinović, Saša Magazinović, Momčilo Novaković, Zaim Backović, Dušanka Majkić, Denis Bećirović, Mirsad Donlagić i Sadik Ahmetović. U raspravi je učestvovao i zamjenik ministra sigurnosti Mijo Krešić.

U raspravi su zaključke predložili Damir Arnaut i Mirsad Donlagić.

**Zaključak Damira Arnauta glasi: „Predstavnički dom Parlamentarne skupštine BiH izražava saučešće porodicama pripadnika Oružanih snaga BiH ubijenih u terorističkom napadu u Rajlovcu te traži od Vijeća ministara BiH da u što skorijem roku, a najkasnije do 30.11.2015., dostavi ovom domu informaciju o tom terorističkom činu i ukupnom stanju sigurnosti u BiH.“**

Zaključak je usvojen s 30 glasova „za“ (iz Federacije BiH 24, iz Republike Srpske šest), jedan „protiv“ i šest „suzdržanih“ glasova.

**Zaključak Mirsada Donlagića glasi: „Zadužuje se Vijeće ministara BiH da, u interesu cjelovitosti informacije o stanju sigurnosti, predloži i mjere koje će preduzeti u sprečavanju djelovanja terorističkih grupa i pojedinaca u BiH.“**

Zaključak je usvojen s 31 glasom „za“ (iz Federacije BiH 25, iz Republike Srpske šest), bez glasova „protiv“ i šest „suzdržanih“ glasova.

#### **Ad.4. Prijedlog zakona o azilu, predlagač: Vijeće ministara BiH, zakon broj: 01,02-02-1-12/15, od 6.8.2015. (drugo čitanje)**

Prvi zamjenik predsjedavajuće je u uvodnim napomenama, uz ostalo, rekao da je u plenarnoj fazi prijedlog amandmana podnio poslanik Damir Arnaut.

U raspravi su učestvovali: Damir Arnaut, Hazim Rančić, Saša Magazinović, Zaim Backović, Denis Bećirović i Šefik Džaferović.

Nakon rasprave, Dom se najprije izjašnjavao o prijedlogu amandmana Damira Arnauta, koji glase:

#### **Amandman I.**

U Prijedlogu zakona o azilu u članu 15. iza dosadašnjeg stava (2) dodaju se novi st. (3) i (4) koji glase:

- (3) Strancu ili licu bez državljanstva zadržanom u centru za prihvata, na graničnom prijelazu, odnosno u tranzitnom prostoru, koje bi željelo izraziti namjeru, policijski službenici pružit će sve potrebne informacije o postupku odobrenja azila na jeziku za koji se opravdano pretpostavlja da ga razumije i na kojem može komunicirati.
- (4) Ministarstvo će u roku od 15 dana od izražene namjere obavijestiti tražioca o načinu provođenja postupka odobrenja azila, o pravima i obavezama koje ima u tom postupku, kao i o mogućnosti obraćanja predstavnicima UNHCR-a i drugim organizacijama koje se bave zaštitom prava izbjeglica ili pojedinih ranjivih grupa, te mogućnosti dobivanja besplatne pravne pomoći.

## **Amandman II.**

U Prijedlogu zakona o azilu iza člana 15. dodaje se novi član 16. koji glasi:

### **Član 16. (Prevodioci)**

- (1) Ministarstvo će sklopiti ugovor s prevodiocem ako je:
  1. ocijenjeno da dobro poznaje službene jezike u Bosni i Hercegovini, u pismu i govoru;
  2. ocijenjeno da dobro poznaje jezik za koji se angažira;
  3. utvrđeno da ne postoji okolnost koja predstavlja prepreku za prijem u državnu službu u skladu s propisima kojima se regulira prijem u državnu službu;
  4. utvrđeno da ne postoji sigurnosna prepreka nakon provedene osnovne sigurnosne provjere u skladu s propisima kojima se reguliraju sigurnosne provjere.
- (2) Prevodilac iz stava (1) ovog člana tokom postupka mora biti pouzdan, nepristran te prevoditi istinito i tačno.
- (3) Prevodilac iz stava (1) ovog člana dužan je postupati u skladu s propisima kojima se uređuje oblast zaštite ličnih podataka.
- (4) Lista prevodilaca objavljuje se na službenoj stranici Ministarstva.
- (5) Usluge prevođenja moguće je pružati putem telekomunikacijskih ili audiovizuelnih elektronskih uređaja.“

Dosadašnji čl. od 16. do 83. postaju čl. od 17. do 84.

## **Amandman III.**

U Prijedlogu zakona o azilu iza dosadašnjeg člana 20. dodaje se novi član 21. koji glasi:

### **Član 21. (Razlozi progona)**

- (1) Rasa posebno uključuje boju kože, porijeklo te pripadnost određenoj etničkoj grupi.
- (2) Vjera posebno uključuje teistička, neteistička i ateistička uvjerenja, učešće ili neučešće u privatnim ili javnim formalnim vjerskim obredima, samostalno ili u zajednici s drugima, druge vjerske obrede ili izražavanje vjere, ili oblike ličnog ili zajedničkog ponašanja koji se zasnivaju na vjerskom uvjerenju ili iz njega proizlaze.
- (3) Nacionalnost posebno uključuje pripadnost grupi koja je određena po svom kulturnom, etničkom ili jezičkom identitetu, zajedničkom geografskom ili političkom porijeklu ili odnosu sa stanovništvom neke druge zemlje, a može obuhvatiti i državljanstvo.
- (4) Političko mišljenje, stav ili uvjerenje o stvarima povezanim s mogućim progoniocima iz člana 24. ovog zakona te njihove politike ili metode, bez obzira da li je tražilac azila postupao po tom mišljenju, stavu ili uvjerenju.
- (5) Određena društvena grupa posebno uključuje članove koji imaju zajedničke urođene osobine ili zajedničko porijeklo koje se ne može izmijeniti, odnosno karakteristike ili uvjerenja, u toj mjeri značajna za njihov identitet ili svijest da se ta lica ne smiju prisiliti da ih se odreknu, a ta grupa ima poseban identitet u zemlji porijekla jer je društvo koje je okružuje smatra različitom. Zavisno od okolnosti u zemlji porijekla, određena društvena grupa može označavati i grupu koja se zasniva na zajedničkim karakteristikama spolnog opredjeljenja. Spolnim opredjeljenjem ne mogu se smatrati djela koja se smatraju



krivičnim djelima u skladu sa zakonodavstvom Bosne i Hercegovine, karakteristike u vezi sa spolom, uključujući rodni identitet, moraju se uzeti u obzir za potrebe određivanja pripadnosti određenoj društvenoj grupi ili utvrđivanja osobina takve grupe.“

„Za“ prijedlog amandmana glasalo je 26 poslanika (iz Federacije BiH 24, iz Republike Srpske dva), „protiv“ 11, a „suzdržanih“ nije bilo. Prvi zamjenik predsjedavajuće konstatirao je da nema potrebne entitetske većine i da će Kolegij Doma kao komisija obaviti naknadno usaglašavanje o prijedlogu amandmana poslanika Damira Arnauta.

**Ad.5. Razmatranje informacija o kršenju ljudskih prava i sloboda, te prava iz oblasti rada od strane rukovodstva kompanije „Boksit“ Milići, predlađač: poslanica Aleksandra Pandurević, broj: 01-50-1-15-20/15, od 24.11.2015.**

Prvi zamjenik predsjedavajuće dao je uvodne napomene, nakon kojih su diskutirali: Aleksandra Pandurević, Staša Košarac, Nikola Špirić, Mladen Bosić, Maja Gasal-Vražalica, Momčilo Novaković, Dušanka Majkić, Diana Zelenika, Denis Bećirović, Zaim Backović, Lazar Prodanović, Hazim Rančić i Nermina Kapetanović.

Na prijedlog poslanice Aleksandre Pandurević uz korekcije koje su predložili Šefik Džaferović i Momčilo Novaković, Dom je, s 23 glasa „za“ (iz Federacije BiH 18, iz Republike Srpske pet), šest glasova „protiv“ i osam „suzdržanih“ glasova, usvojio sljedeće zaključke:

1. *„Predstavnički dom zadužuje Instituciju ombudsmena za ljudska prava BiH da do 15. januara 2016. sačini i Domu dostavi specijalni izvještaj o stanju ljudskih i prava iz oblasti rada u kompaniji „Boksit“ Milići.*
2. *Predstavnički dom najoštrije osuđuje svako kršenje ljudskih i prava iz oblasti rada, kao najgrublji atak na vladavinu prava i poziva sve nadležne institucije da adekvatno reagiraju i zaštite ustavima i zakonima zagwarantirana prava.*
3. *Predstavnički dom daje punu podršku medijima u BiH i njihovom izvještavanju o društveno i pravno neprihvatljivom ponašanju i najoštrije osuđuje pritiske kojima su izloženi.“*

**Ad.6.-78.**

Prvi zamjenik predsjedavajućeg je, prije prelaska na tačku 6. dnevnog reda, stavio na glasanje prijedlog da se objedini rasprava o tačkama 6. – 78., s obzirom na to da je riječ o izvještajima Ureda za reviziju institucija BiH o finansijskoj reviziji institucija BiH za 2014. godinu.

Prijedlog je usvojen s 25 glasova „za“ (iz Federacije BiH 14, iz Republike Srpske 11), tri „protiv“ i jednim „suzdržanim“ glasom.

Domu se obratio generalni revizor Dragan Vrankić.

Prvi zamjenik predsjedavajuće dao je uvodne napomene, te otvorio raspravu. U raspravi su učestvovali: Predrag Kožul, Dušanka Majkić, Aleksandra Pandurević, Zaim Backović, Lazar Prodanović, Mirsad Isaković, Salko Sokolović, Amir Fazlić, Safer Demirović, Šefik Džaferović i Nikola Lovrinović.

Dom je, s 30 glasova „za“ (iz Federacije BiH 18, iz Republike Srpske 12), tri „protiv“ i četiri „suzdržana“ glasa, odlučio da objedini glasanje o tačkama od 6. do 78.

Nakon toga, prvi zamjenik predsjedavajuće stavio je na glasanje izvještaje o finansijskoj reviziji institucija BiH za 2014. godinu, zajedno sa zaključcima iz zbirnog mišljenja Komisije za finansije i budžet i zaključcima iz pojedinačnih mišljenja Komisije.

Izvještaji Ureda za reviziju institucija BiH o finansijskoj reviziji institucija BiH za 2014. godinu, sa zaključcima iz Zbirnog mišljenja Komisije za finansije i budžet i zaključcima iz pojedinačnih mišljenja Komisije, usvojeni su s 31 glasom „za“ (iz Federacije BiH 19, iz Republike Srpske 12), jednim „protiv“ i pet „suzdržanih“ glasova.

Usvojeni zaključci sadržani u Zbirnom mišljenju Komisije za finansije i budžet glase:

1. *„Predstavnički dom prihvata 73 revizorska izvještaja o finansijskom poslovanju institucija BiH za 2014. godinu, od čega:*
  - a) *66 revizorskih izvještaja institucija čije je finansijsko poslovanje ocijenjeno revizorskim „pozitivnim mišljenjem“ i „pozitivnim mišljenjem sa isticanjem predmeta“ - Prilog 1. Zbirnog mišljenja.*
  - b) *7 revizorskih izvještaja institucija čije je finansijsko poslovanje ocijenjeno revizorskim „mišljenjem s rezervom“, „mišljenjem s rezervom uz isticanje predmeta“ i jednim „pozitivnim mišljenjem sa isticanjem predmeta“ - Prilog 2. Zbirnog mišljenja.*
2. *Predstavnički dom obavezuje rukovodstva 36 institucija BiH čije je finansijsko poslovanje u 2014. godini ocijenjeno revizorskim „pozitivnim mišljenjem sa isticanjem predmeta“ da preduzmu sve potrebne mjere iz nadležnosti svake institucije pojedinačno, kako bi se izbjegle daljnje posljedice problema u poslovanju na koje je revizija skrenula pažnju pri isticanju predmeta u pozitivnom mišljenju, a posebno da materijalnost takvih nalaza revizije eventualno ne preraste u buduće kvalifikacije u narednim izvještajima revizije.*
3. *Predstavnički dom usvaja predložene zaključke Komisije za sedam institucija BiH, sadržane u pojedinačnim mišljenjima Komisije za svaku instituciju BiH, a čiji su revizorski izvještaji o finansijskom poslovanju za 2014. godinu bili predmet detaljne analize u Komisiji - Prilog 2. Zbirnog mišljenja.*
4. *Predstavnički dom traži od Vijeća ministara BiH da najkasnije do kraja februara 2016. razmotri revizorske izvještaje za 2014. godinu, s akcentom na sedam institucija BiH čiji su revizorski izvještaji o finansijskom poslovanju za 2014. godinu ocijenjeni revizorskim „mišljenjem s rezervom“, „mišljenjem s rezervom sa isticanjem predmeta“ i jednim izvještajem s „pozitivnim mišljenjem sa isticanjem predmeta“, kao i pripadajuće zaključke iz Priloga 2, uz obavezu sačinjavanja cjelovite informacije o tome, te njenog dostavljanja Parlamentarnoj skupštini BiH u roku ne dužem od 30 dana od datuma razmatranja, koja će minimalno sadržavati sljedeće:*
  - 4.1. *Programe aktivnosti i mjera koji će biti preduzeti u navedenih sedam institucija iz Priloga 2, u pravcu prevazilaženja teškoća u poslovanju i preventivnog djelovanja kako se one ne bi ponovile u narednim izvještajima;*
  - 4.2. *Izjašnjenje Vijeća ministara BiH o sistemskim mjerama koje je predložio Ured za reviziju (navedene pod tačkom III d od 1 do 18 Zbirnog mišljenja) kojima bi se na sistemskom nivou otklonili uzroci ponavljanja određenih revizijskih nalaza;*

**4.3. Izjašnjenje Vijeća ministara BiH u programskom formatu, s nosiocima obaveza i rokovima za izvršenje aktivnosti usmjerenih ka jačanju kontrolnog okruženja, donošenjem novih propisa ili dogradnjom postojećih propisa (izdvojene prema kategorijama izdataka navedenim u tački IIIe od 1.1.1. do 1.1.13. Zbirnog mišljenja), kao i aktivnosti i mjere usmjerene ka dodatnom jačanju nadzora i kontrolnih postupaka (izdvojene prema kategorijama izdataka navedenim u tački IIIe od 2.1.1. do 2.1.31. Zbirnog mišljenja).**

Nakon toga, prvi zamjenik predsjedavajućeg stavio je na glasanje prijedlog zaključka poslanice Aleksandre Pandurević, koji glasi: „*Predstavnički dom poziva Tužilaštvo BiH da pažnju prioritetno posveti istrazi po Izvještaju Ureda za reviziju institucija BiH o finansijskoj reviziji Agencije za identifikacione dokumente za 2013.godinu i donese tužilačku odluku.*“

Zaključak je usvojen s 20 glasova „za“ (iz Federacije BiH 14, iz Republike Srpske šest), sedam „protiv“ i deset „suzdržanih“ glasova.

**Ad.79. Izvještaj o obavljenoj reviziji učinka o temi: „Uspostava javnih internih finansijskih kontrola (PIFC-a) u institucijama BiH“, materijal Ureda za reviziju institucija BiH, broj: 01/4-16-1-1091/15, od 3.8.2015.**

Prvi zamjenik predsjedavajuće dao je uvodne napomene. Nije bilo rasprave.

Izvještaj o obavljenoj reviziji učinka o temi: „Uspostava javnih internih finansijskih kontrola (PIFC-a) u institucijama BiH usvojen je s 34 glasa „za“ (iz Federacije BiH 22, iz Republike Srpske 12), jednim „protiv“ i dva „suzdržana“ glasa. Time je usvojen i zaključak iz Mišljenja Komisije za finansije i budžet, koji glasi: „*Predstavnički dom Parlamentarne skupštine BiH traži od Vijeća ministara BiH, Centralne harmonizacijske jedinice BiH, institucija BiH koje su obuhvaćene izvještajem revizije učinka da u roku od šest mjeseci izvijeste Komisiju za finansije i budžet Predstavničkog doma o planiranim i preduzetim aktivnostima na realizaciji preporuka iz Izvještaja, te da o preduzetim aktivnostima upoznaju Ured za reviziju institucija BiH.*“

**Ad.80. Izvještaj o primjeni Jedinostvenih pravila za izradu pravnih propisa u institucijama Bosne i Hercegovine, materijal Ministarstva pravde BiH, broj: 01,02-50-19-1331/15, od 19.10.2015.**

Prvi zamjenik predsjedavajuće dao je uvodne napomene. Nije bilo rasprave.

Izvještaj o primjeni Jedinostvenih pravila za izradu pravnih propisa u institucijama Bosne i Hercegovine usvojen je 33 glasa „za“ (iz Federacije BiH 21, iz Republike Srpske 12), jednim „protiv“ i tri „suzdržana“ glasa.

**Ad.81. Izvještaj o učešću pripadnika Oružanih snaga BiH i policijskih službenika u operacijama podrške miru u periodu od 1. januara do 30. juna 2015., materijal Predsjedništva BiH, broj: 01,02-03-1348/15, od 21.10.2015.**

Prvi zamjenik predsjedavajuće dao je uvodne napomene. U raspravi je učestvovala Dušanka Majkić.



Izvještaj o učešću pripadnika Oružanih snaga BiH i policijskih službenika u operacijama podrške miru u periodu od 1. januara do 30. juna 2015., usvojen je jednoglasno s 37 glasova „za“ (iz Federacije BiH 25, iz Republike Srpske 12), bez glasova „protiv“ i „suzdržan.“

Zatim se Dom izjašnjavao o prijedlogu zaključka poslanice Dušanke Majkić, koji glasi: „*Predstavnički dom Parlamentarne skupštine BiH traži od ministra sigurnosti da u najkraćem roku inicira izradu Pravilnika o uniformama prilagođenim klimatskim uslovima u kojima rade policijski službenici u mirovnim misijama, te da, nakon što ga usvoji Vijeće ministara BiH, o tome informira Predstavnički dom Parlamentarne skupštine BiH.*“ Zaključak je usvojen s 34 glasa „za“ (iz Federacije BiH 22, iz Republike Srpske 12), jednim „protiv“ i dva „suzdržana“ glasa.

**Ad.82. Informacija o Godišnjem planu obuke i vježbi pripadnika i jedinica Oružanih snaga Bosne i Hercegovine u inozemstvu za 2016. godinu, materijal Ministarstva odbrane BiH, broj: 03/1-03-1412/15, od 2.11.2015.**

Prvi zamjenik predsjedavajuće dao je uvodne napomene. Nije bilo rasprave.

Predstavnički dom jednoglasno je primio k znanju Informaciju o Godišnjem planu obuke i vježbi pripadnika i jedinica Oružanih snaga Bosne i Hercegovine u inozemstvu za 2016. godinu, s 37 glasova „za“ (iz Federacije BiH 25, iz Republike Srpske 12), bez glasova „protiv“ i „suzdržan.“

**Ad.83. Informacija o problemu rješavanja trajnog smještaja Agencije za prevenciju korupcije i koordinaciju borbe protiv korupcije u Istočnom Sarajevu, materijal Komisije za izbor i praćenje rada Agencije za prevenciju korupcije i koordinaciju borbe protiv korupcije, broj: 05/8-50-19-370-6/15, od 6.10.2015.**

Prvi zamjenik predsjedavajuće dao je uvodne napomene. Domu se obratio Sead Lisak, direktor Agencije za prevenciju korupcije i koordinaciju borbe protiv korupcije.

U raspravi su učestvovali: Hanka Vajzović, Dušanka Majkić, Aleksandra Pandurević, Zaim Backović i Nikola Špirić.

U raspravi zaključke su predložile Aleksandra Pandurević kao predsjedavajuća Komisije za izbor i praćenje rada Agencije za prevenciju korupcije i koordinaciju borbe protiv korupcije i Dušanka Majkić.

Dom se prvo izjašnjavao o Informaciji o problemu rješavanja trajnog smještaja Agencije za prevenciju korupcije i koordinaciju borbe protiv korupcije u Istočnom Sarajevu. Informacija je primljena k znaju s 31 glasom „za“ (iz Federacije BiH 20, iz Republike Srpske 11), jednim „protiv“ i pet „suzdržanih“ glasova.

Zatim je prvi zamjenik predsjedavajućeg na glasanje dao prijedloge zaključaka iznesenih u raspravi.



Na prijedlog poslanice Aleksandre Pandurević usvojeni su modificirani zaključci Komisije za izbor i praćenje rada Agencije za prevenciju korupcije i koordinaciju borbe protiv korupcije, s 27 glasova „za“ (iz Federacije BiH 16, iz Republike Srpske 11), bez glasova „protiv“ i deset „suzdržanih“ glasova, a oni glase:

1. *„Predstavnički dom Parlamentarne skupštine BiH zahtijeva od Vijeća ministara BiH da hitno stavi van snage Odluku o raspodjeli kancelarijskog prostora za smještaj institucija BiH u Istočnom Sarajevu („Službeni glasnik BiH“, broj 17/15 od 2.3.2015.) u dijelu koji se odnosi na Agenciju za prevenciju korupcije i koordinaciju borbe protiv korupcije, te da na adekvatan način riješi pitanje smještaja Agencije za prevenciju korupcije i koordinaciju borbe protiv korupcije, jer dodijeljeni prostor ne odgovara njenim potrebama kao i da razmotri mogućnost da se navedeni prostor u ulici Dabrobosanka u Istočnom Sarajevu u cijelosti dodijeli Agenciji za prevenciju korupcije i koordinaciju borbe protiv korupcije.*
2. *Predstavnički dom Parlamentarne skupštine BiH zahtijeva od Vijeća ministara BiH da pokrene pitanje odgovornosti nadležnih u Službi za zajedničke poslove institucija BiH zbog propusta napravljenih prilikom nabavke i dodjele prostorija za potrebe rada Agencije za prevenciju korupcije i koordinaciju borbe protiv korupcije u Istočnom Sarajevu.“*

Prijedlog zaključka poslanice Dušanke Majkić usvojen je s 19 glasova „za“ (iz Federacije BiH 11, iz Republike Srpske osam), pet glasova „protiv“ i 13 „suzdržanih“ glasova. Zaključak glasi: *„Nalaže se Vijeću ministara BiH da donese odluku da kupljeni prostor u Istočnom Sarajevu površine 407,09 m<sup>2</sup> u cijelosti dodijeli Agenciji za prevenciju korupcije i koordinaciju borbe protiv korupcije.“*

**Ad.84. Izbor četiri člana Upravnog odbora Agencije za razvoj visokog obrazovanja i osiguranje kvaliteta, materijal Privremene zajedničke komisije oba doma Parlamentarne skupštine BiH za provođenje procedure za izbor četiri člana Upravnog odbora Agencije za razvoj visokog obrazovanja i osiguranje kvaliteta, broj: 01,02-50-14-843-5/15, od 29.10.2015.**

Prvi zamjenik predsjedavajuće dao je uvodne napomene. U raspravi su učestvovali: Mirsad Mešić, Saša Magazinović, Senad Šepić, Mensura Beganović, Nikola Lovrinović, Sadik Ahmetović, Mladen Bosić, Maja Gasal-Vražalica, Momčilo Novaković, Denis Bećirović, Miroslav Milovanović, Nenad Lalić, Lazar Prodanović, Zaim Backović, Nikola Špirić, Damir Bećirović, Damir Arnaut i Mirsad Donlagić.

Privremena zajednička komisija dostavila je sljedeću rang-listu kandidata:

1. Momčilo Pelemiš	Ostali	97,3 bodova
2. Nikola Poplašen	Srbini	96,8 bodova
3. Midhat Jašić	Bošnjaci	96,6 bodova
4. Marinko Jurilj	Hrvati	96,5 bodova

Predstavnički dom nije izabrao četiri člana Upravnog odbora Agencije za razvoj visokog obrazovanja i osiguranje kvaliteta, materijal Privremene zajedničke komisije oba doma Parlamentarne skupštine BiH za provođenje procedure za izbor četiri člana Upravnog odbora

Agencije za razvoj visokog obrazovanja i osiguranje kvaliteta. „Za“ je glasalo šest poslanika (iz Republike Srpske), „protiv“ 23, a „suzdržano“ je bilo osam poslanika.

U raspravi zaključak je predložio Nikola Lovrinović, ali se o njemu nije glasalo, jer je predlagač povukao svoj prijedlog zaključka, a on glasi: *„Predlažem da se umjesto Nikole Poplašena imenuje Milenko Stanić u Upravnom odboru Agencije za visoko obrazovanje.“*

**Ad.85. Imenovanje jednog predstavnika akademske zajednice i jednog predstavnika nevladinog sektora u Komisiju za izbor i praćenje rada Agencije za prevenciju korupcije i koordinaciju borbe protiv korupcije, materijal Privremene zajedničke komisije oba doma Parlamentarne skupštine BiH za provođenje procedure za imenovanje jednog predstavnika akademske zajednice i jednog predstavnika nevladinog sektora u Komisiju za izbor i praćenje rada Agencije za prevenciju korupcije i koordinaciju borbe protiv korupcije, broj: 01,02-50-14-468-6,3/15, od 5.11.2015.**

Prvi zamjenik predsjedavajuće dao je uvodne napomene. U raspravi su učestvovali: Nermina Kapetanović, Zaim Backović i Monika Tomić.

Dom je, sa 18 glasova „za“ (iz Federacije BiH 13, iz Republike Srpske pet), 16 glasova „protiv“ i tri „suzdržana“ glasa, za predstavnika akademske zajednice u Komisiju za izbor i praćenje rada Agencije za prevenciju korupcije i koordinaciju borbe protiv korupcije imenovao prof. dr. sc. Ivanku Marković, a za predstavnika nevladinog sektora Anesa Ličinu.

**Ad.86. Prijedlog zaključka o osnivanju Privremene zajedničke komisije oba doma Parlamentarne skupštine BiH za provođenje procedure za imenovanje zamjenika generalnog revizora Ureda za reviziju institucija BiH, predlagač: Zajednički kolegij oba doma Parlamentarne skupštine BiH, broj: 01,02-50-12-18-10,1/15, od 29.10.2015.**

Nakon uvodnih napomena prvog zamjenika predsjedavajuće, kratko je komentirao Damir Bećirović.

Prijedlog zaključka o osnivanju Privremene zajedničke komisije oba doma Parlamentarne skupštine BiH za provođenje procedure za imenovanje zamjenika generalnog revizora Ureda za reviziju institucija BiH usvojen je s 25 glasova „za“ (iz Federacije BiH 14, iz Republike Srpske 11), devet „protiv“ i tri „suzdržana“ glasa. Za članove Privremene zajedničke komisije, iz Predstavničkog doma imenovani su poslanici: Asim Sarajlić, Diana Zelenika i Đorđo Krčmar.

**Ad.87. - 90.**

Prije prelaska na tačku 87., prvi zamjenik predsjedavajuće dao je na glasanje prijedlog za objedinjavanje rasprave o tačkama 87. - 90., s obzirom na to da je riječ o davanju saglasnosti za ratifikaciju materijala. Prijedlog je prihvaćen s 23 glasa „za“ (iz

Federacije BiH 14, iz Republike Srpske devet), devet glasova „protiv“ i pet „suzdržanih“ glasova.

Nakon uvodnih napomena prvog zamjenika predsjedavajuće, otvorena je rasprava. U raspravi su učestvovali: Jasmin Emrić, Hanka Vajzović, Zaim Backović, Salko Sokolović, Denis Bećirović, Nikola Lovrinović, Nikola Špirić i Lazar Prodanović.

Zatim je prvi zamjenik predsjedavajuće dao na glasanje sporazume pojedinačno.

Data je saglasnost za ratifikaciju:

- Aneksa IV. Sporazuma između Bosne i Hercegovine i Kraljevine Norveške o finansiranju projekta u korist pravosuđa i/ili sudova i tužilaštava u Bosni i Hercegovini, broj: 01,02-05-2-1305/15 od 13.10.2015., s 36 glasova „za“ (iz Federacije BiH 24, iz Republike Srpske 12), bez glasova „protiv“ i jednim „suzdržanim“ glasom,
- Sporazuma između Vijeća ministara Bosne i Hercegovine i Vlade Republike Srbije o izgradnji međudržavnog mosta preko rijeke Drine s pratećim putnim objektima na lokaciji Bratunac – Ljubovija, broj: 01,02-05-2-1384/15 od 28.10.2015., s 36 glasova „za“ (iz Federacije BiH 24, iz Republike Srpske 12), bez glasova „protiv“ i jednim „suzdržanim“ glasom,
- Ugovora o državnoj granici između Bosne i Hercegovine i Crne Gore, broj: 01,02-05-2-1385/15 od 28.10.2015., s 23 glasa „za“ (iz Federacije BiH 12, iz Republike Srpske 11), deset glasova „protiv“ i četiri „suzdržana“ glasa, uz konstataciju da je zadovoljena entitetska većina. Zbog kvara na sistemu elektronskog glasanja, glasanje je obavljeno glasačkim kartonima;
- Amandmana na Sporazum o grantu u okviru Državnog programa IPA 2009 za Bosnu i Hercegovinu – Poboljšanje infrastrukture regionalne osnovne saobraćajne mreže u BiH – željeznički saobraćaj – zaključen između Evropske investicione banke i Bosne i Hercegovine, broj: 01,02-05-2-1433/15 od 6.11.2015., s 33 glasa „za“ (iz Federacije BiH 21, iz Republike Srpske 12), bez glasova „protiv“ i četiri „suzdržana“ glasa.

Sjednica je završena u 21,40 sati.

Sastavni dio Zapisnika je transkript 20. sjednice Predstavničkog doma.

SEKRETAR  
PREDSTAVNIČKOG DOMA

  
Marin Vukoja

PREDSEDavajuća  
PREDSTAVNIČKOG DOMA  
Borjana Krišto

